

12 OCT 2001

Melayu-Muhammad

JANGAN TERBELENGGU DENGAN SIKAP KAIS PAGI MAKAN PAGI, KATA MUHAMMAD

KUALA LUMPUR, 12 Okt (Bernama) -- Masyarakat Melayu digesa berfikir dan sentiasa dididik untuk berfikir menjangkau beberapa generasi akan datang dan sentiasa berpandangan jauh bagi mengelakkan ketinggalan dalam dunia tanpa sempadan kini.

Pengerusi Lembaga Pengarah Yayasan Sekretariat Melayu Antarabangsa Tan Sri Muhammad Muhd Taib berkata orang Melayu tidak sepatutnya terbelenggu dengan falsafah kais pagi makan pagi dan kais petang makan petang kerana ia adalah satu nilai yang wujud pada bangsa yang tidak berdaya saing.

"Bercita-cita besar, mempunyai kualiti untuk memimpin dan membela nasib generasi akan datang dan pembelaan bagi bangsa-bangsa yang memerlukan, adalah ciri-ciri baru yang perlu ditanamkan kepada bangsa Melayu ke arah menjadikan mereka global tribes," katanya.

Beliau berkata demikian ketika berucap merasmikan Persidangan Dunia Melayu di Pusat Dagangan Dunia Putra (PWTC) di sini malam ini.

Muhammad berkata pengalaman di Malaysia menunjukkan usaha Perdana Menteri Datuk Seri Dr Mahathir Mohamad yang mensasarkan Wawasan 2020 bagi negara ini menjadi negara maju.

Ia merupakan suntikan perubahan yang cuba dibuat oleh Dr Mahathir, kata beliau.

Katanya, jati diri Melayu perlu diperkukuhkan untuk memastikan ia tidak dilemahkan oleh unsur negatif sama ada persoalan yang bersifat tempatan atau pun antarabangsa.

Katanya, jika gelombang globalisasi dan universalisme tidak ditangani dan difahami, ia akan menjerumuskan orang Melayu kepada perangkap "westernisation".

"Ini merupakan ancaman hebat terhadap bangsa Melayu, khususnya kepada mereka yang menjadi etnik minoriti di negara masing-masing," katanya lagi.

Persidangan dua hari itu yang mengambil tema "Melayu dan Ertinya keMelayuan" adalah anjuran Gabungan Penulis Nasional (Gapena) dengan kerjasama Persatuan Sejarah Malaysia, Persatuan Melayu Pulau Pinang, Persatuan Rumpun Melayu Lahad Datu dan Persatuan Bumiputra Iranun dari Sabah, Yayasan Sekretariat Melayu Antarabangsa dan Dewan Perhimpunan Melayu Kedah.

Pembentang kertas kerja terdiri dari ahli akademik, sejarawan dan sasterawan dari Malaysia, Indonesia, Singapura, Brunei, Filipina, Thailand, Kemboja, Sri Lanka, Madagaskar, Tonga, Afrika Selatan dan England.

-- BERNAMA

SHS DC ZB